

1986-05-13- SS Ioannes Paulus II - Epistola ‘Occasione Anni Sancti Martyrum Ugandensium’

EPISTULA IOANNIS PAULI PP. II OCCASIONE ANNI SANCTI MARTYRUM UGANDENSIVM

Vix quisquam vere est quin aliquando cognoverit quam unam sua in Pontificis Maximi vita nationem Africæ Decessor Noster immortalis memoriae Paulus Sextus praesens ipse invisisset, quid tandem illic effecturus tam arduum suscepisset iter, qua dein pietate alacritateque tres eos memorabiles sane dies transegisset.

Ugandæ scilicet populum primum solumque omnium Africæ septendecim abhinc annos adiit religioso quidem peregrinatoris sacri animo ut eosdem viginti et duos Martyres Ugandenses, quos laetissimus ille quinque ante annos Sanctorum caelitum catalogo adscripserat, venerabundus proprio in eorum sacello honoraret excoletret praedicaret, quim immo aram exaedificandi templi fausta precatione lustraret et rite expiaret.

Simili autem et Nos nunc mentis adfectu voluntatisque studio convertimur dilectam ad Uganda civitatem ac praesertim catholicam inibi communitem, dum peculiarem ex longinquo gratulationem laetationemque Nostram communicare gestimus cum omni ea ecclesia, quandoquidem iamiamque centesimum ipsum annum concelebraturi sunt ex quo gloriosam pro Christo ii ipsi martyres occubuere mortem. Nos igitur velut revera adstantes participare iuvat honorem illius ecclesiae ipsius necnon cultum eius fervidum erga hos animosos fidei testes, Christi adsectatores, Ecclesiae sanguine suo aedificatores.

At praeter tales quos intus gerimus animi sensus in Uganda nationem ea ecclesiam, in martyres ipsos eorumque hodie posteros christifideles, foris etiam palamque significari volumus participatum Nostrum studium anniversariae huius memoriae quam didicimus potissimum Kampalæ proximi mensis Iunii tertio die quasi in culmine quodam minorum per annum rituum iri sollemniter celebratum. Invitanti properea Nos Venerabili Fratri Iosepho Willigers, Episcopo ipsi Gingiano ac Praesidi in praesentia Conferentiae Episcopalis Ugandensis ac peculiarem Nostrum legatum demisse efflagitanti perlubenter Nos obsequimur et concedimus fisi nempe omnino demonstratam sic Romani Pontificis participationem plurimum dignitatí rei sollemniumque decori collatarum.

Nec quemquam magis reperimus idoneum et aptum idem ad explendum officium temet ipso, Venerabilis Frater Noster, cuius est pro Nobis christiano nomini ubique gentium disseminando invigilare ac studere quique novimus profecto quam diligenter amanterque simul hanc tibi commendatam sis procuraturus legationem. Harum proin litterarum virtute Missum Te Extraordinarium Nostrum nominamus destinamusque ad ritus centenarios Kampalæ mense Iunio honorandis Sanctis Martyribus Ugandensibus; ubi publica pro Nobis auctoritate aderis loquerisque, praesidebis et ad mentem Nostram orabis ac secundum eam cohortationem qua huius recordationis momentum et pondus proponi volumus meditationi et imitationi Ecclesiae Ugandensis.

Ex Aedibus Vaticanis, die XIII mensis Maii anno Domini MCMLXXXVI Pontificatus Nostri octavo.

IOANNES PAULUS PP. II

© Copyright 1986 - Libreria Editrice Vaticana